

Jaorverslag vastelaovesverieniging De Spurriemök seizoen 1998/1999.

Ut is un bitje tège kost, mar ut huurt now iënmaol bej un jaorverslag en durrum begint ok dit jaor ut jaorverslag mit de ciefers, de datums en de name van ut carnavalsseizoen 1998/1999.

Ut bestuur bestond uut:

Vurzitter	Jan Nelissen
Penningmèster	Twan Voermans
Secretaresse	Lilian Zanders
Vorst	Wout Zanders
Bestuursleje	Marco de Mulder Peter Claessens Martien Steeghs

De raad van elluf bestond dit jaor uut:

Jan Classens	Herman Jacobs	Marcel Martens	Peter Willems
Ruud Classens	Jan Lemmen	Henk Nabben	Marc Zanders
Dave Clephas	Erik Loonen	Ton Nabben	Ruud Zanders
Eric Geurts	Hans Loonen	Leo Peeters	

De raad van elluf vergaderde 5 kier bej Wout en Lilian an de Zandhoek.

Ut bestuur kwaam ien totaal 8 kier bejen.

Ovver dat laeste heb ik trouwes ozze vurzitter nog efkes gebeld. Want toen ik miene map dur op nao keek hoeveul bestuursvergaderinge wej gehad han, kreeg ik ut gevuul dat ik ut verslag van 1 vergadering miste.

Dus ik denk: wette wat, ik bel Jan efkes op um te vraoge of dat den misschien iën verslag mier ien ziene map het zitte as ik.

Dus ik bel bej Jan en Jeanne en toen kreeg ik Moniek an de tillefoon. Ik zeg goeiemiddag Moniek mit Lilian, is pap of mam ok thuis? Zet Moniek mit un fluusterende stem: die zien bezig. Toen zej ik tigde Moniek: O, gefit niks dan bel ik straks nog wel enne kier terug. Dus ik bel later nog enne kier terug, krieg ik wer Moniek an de tillefoon. Ik zeg: kan pap of mam now wel an de tillefoon komme? Zet Moniek wer mit un fluusterende stem: die zien nog steeds bezig. Dus ik zej wer tigde Moniek: O gefit niks, ik probier ut straks nog wel enne kier. Dus ik probier ut un uur later nog enne kier en toen kreeg ik wer Moniek duran. Ik Moniek wer gevraagd of dat ik pap of mam an de tillefoon moog, zet Moniek wer mit un fluusterende stem: die zien nog steeds bezig.

Ik wier onderhand un bitje ongeduldig dus ik vraog an Moniek: waor zien die dan toch mit bezig? Zet Moniek mit un fluusterende stem: mit mej an 't zuuke.

Mar uiteindeluk heb ik Jan toch an de tillefoon gekrege en ut bestuur vergaderde dus 8 kier.

Ut antal leje bedroeg: 132.

Hiervan ware dur 7 bestuurslid, 15 raadslid en 5 iere-lid nameluk Jan Beerkens, Thei Hendrix, Hay Steeghs, Wil Willems en Gerrit Houwen.

De rest, 105 ien aantal, steunt os verieniging en zit veuran op dun Bonte Aovend.

Zoë now wej de zwaore kost van dit jaorverslag gehad hebbe, kan ik eindeluk beginne mit ut eigelukke jaorverslag van ut carnavalsjaor 1999. Het jaor van ozze Prins Dave dun Urste en zien Prinses Rian.

En zoëas elk jaor begos dan ok ut vurrig jaor mit de jaorvergadering, waarvan ik net ut verslag vurgeleze heb. Zaoterdags nao de jaorvergadering was ut vorsteraodsbal, dit jaor dicht bej huus, bej de Karklingels ien Aostrum.

Zoëas elk jaor ok dit jaor wer enne moje aovend. Ut mojste van dun aovend was toch wel dat Fred (oftewel Erik Loonen) al bej de speech van dun 3^e vorst lej te slaope.

Op zich niks biezonders, want dat duut ie bej os op dun Bonte Aovend ok wel es mej. An ut end van dun aovend wier ut Fred toch te veul en besloot ie um mar ien dun auto te gaon ligge slaope. Efkus latter gevolgd dur Bennie (Eric Geurts). En van den leste wiëte wej sinds ut vorsteraodsbal dat ut smerges genne gezellige is. Want toen wej nao afloëp mit zien alle naor huus ginge en Anita van Fred Bennie wakker makte, was ut urste wat hej zej:

Hu, wat motte!!

Wat Anita daor toen op gezet het wiët ik nie, mar zej het os twië slaopende broeders wel netjes mit teruggenome naor Oeldere want twië wèke latter ware zej wer wakker en al op ozze Bonte Aovend.

Den dit jaor an mekaar gepraot wier dur ozze toen nog Prins ziende Prins Math dun Urste, Math Drabbels.

En ok al praotte ie honderd uut, op zaoterdag mos ie dur toch an geluuve. Nao urst same mit zien Prinses Wilma gewasse te zien ien enne mit confetti gevulde perdezoepbak, blaosde ie : Mooi was die tijd en hiel ie enne prachtige leste speech. Um vervolges zien muts mit vère af te zette en as ex-prins Math dun Urste gewoën wer dur te gaon waor ie mit bezig was: dun Bonte Aovend an mekaar praote.

Op dun Bonte Aovend wiere dur ok dit jaor wer un antal minse ien ut zunneke gezet. Jan Nelissen, ozze vuzitter wier nao 11 jaor lid te zien gewist van de raod van 11 en bestuur, onderscheide ien de Orde van de Zilveren Spurriemök. En os neje iërelid Gerrit Houwen kreeg un moj beschilderde dakpan angeboje vur de 21 jaor dat ie lid is gewist van de raod van 11 en ut bestuur.

Wat jaore nie vurgekomme was op ozze Bonte Aovend han wej now wel. Enne echte Oelderse, halluf Casselse, buutreedner. Hans Loonen kroop as Hanneske d'n uutzendkracht ien de ton. En liet Oeldere zien en huure dat Loone Thei nie dun enigste van Loonen is den wet hoe ge Oeldere an ut lache kriegt.

Mar Hans was nie dun enigste buutreedner dit jaor. Opa ging ok nog ien de ton staon, mar ut was moj um te zien dat ut uutzendwerk van Hans bèter ansloeg. Selmke Nelisse haaj ut same mit Geert en Bert Voeste druk ovver de huusnummers van Oeldere. En Berna Hebing, Paulien Peeters en Petra Loone praotte same bovenop de buhn ovver niks anders as kels.

De buhn was bijna te klen toen Jolanda de Rijck, Arno Kursten, Rene en Miranda Voermans, Wilfried en Judith van Dijck, Harm en Sonja Maas en Paul en Mariola Geurts, assehoester, un moj sprookje, opvoerde. Want ze ware nie alliën mit veul. Ze han de buhn ok aardig vol staon. Mar gelukkig was dur nog plats zat ovver vur ozze ege Oelderse durpspolitiek: Ruud Zanders, Peter Claessens, Lia Evers en Ans Verblakt, die tillevisie makte en keke.

En as gej dit alles nog es wilt bekieke, dan lènde gewoën bej Marco de Mulder de videoband van dizze aovend of as gej genne video het lès dan ut verslag ien de carnavalskrant en gej bint wer hiëlemaol bej.

En as gej nie kunt lèze en gej het genne video dan wert ut tied dat gej dur enne kopt.

En dan nao dun Bonte Aovend begint wer de fiëstmaond december. En vur de jonges en megjes van de carnavalsveriëning betèkent dit op tied op de koffie bej Nel en Wil Willems vur ut make van de carnavalskrant. Mar de leste jaore betekent de maond december vur un paar jonges van de raod ok wer mökke laaje. Want ok dit jaor, naodat ozze Prins toegezet haaj dat ie wel Prins woj werre, wier dur mit de mök wer dur halluf Oeldere gesjouwt um de minse wakker te schudde vur de prinseproclamasie.

Zoë stond ie as kerstmök mit lempkes bej Merrit en Angelique, bej de familie Clephas um Oeldere op ut verkierde biën te zette, bej Versleije ziene winkel en bej de Rabobank mit de tekst: Ge mugt alles van mej wiëte behalve wie dat dur prins wert.

En mit dat laeste halde wej toch mar moj mit un groëte foto Dagblad De Limburger.

‘s Zondags mit prinsraoje ware dur wer veul minse die de verkierde ankruuste en wiere os raodsleje zeiknat, want ut regende behuurluk.

Neej mit ut prinsraoje was dat bej ieder huus ien Oeldere enne poster afgegeve wier mit de tekst: Prins 1999. Op dizze poster kosse de minse dan de naam ienvulle van dengene waarvan zej dochte dat den prins zeuj werre. En as zej dizze poster dan duudeluk zichtbaar an de wegkant vur de raam hangde, dan dingde zej mit naor enne extra pries. Ut was un hartstikke moj gezicht, al die posters vur de rame. De mojste poster was toch wel den van Ron Achte. Mit ziene poster: Prins 1999 Claus, zaat ie dur wiet nève, mar haj wel de poster waor ut mest ovver gepraot wier. Jos en Annemarie Willems han de goeje naam iengevuld en wonne dun extra pries: un gratis lidmaatschap van de carnavalsveriëning vur ut seizoen 2000 en un ontbijt op carnavalsmaondag.

De jeugd van de leggere schol stemde vrejdags wer op de drie kandidate die wel jeugdprins of prinses won werre. En zondags op de prinseproclamasie kwame Sjors Philipsen, Agnita Classens en Pim Fleurkes uut un groët durzichtig scherm gespronge as Jeugdprins Sjors dun urste, Jeugdvorstin Agnita en Jeugdinar Pim.

Tsjakka Sjors presentierde as neje Jeugdprins iën van de mojste lijfspreuke van de leste jaore: geij bint un rund as geij genne spurriemök zien kunt. En ik zaag ozze vorst denke, ge bint pas un rund as ge gen plat praote kunt. Mar gelukkig kos Sjors dat wel.

Ozze groëte prins was op dat moment al wer un bitje gewend an zien muts mit vère want den zaag un uurke ierder same mit zien prinses as Prins Dave dun Urste ut lèveslicht.

Vur ut uutkomme van de groëte prins wier de klok efkes teruggedrejd naor dun Bonte Aovend. Same zate zej wer vur dun tillevisie, Peter Claessens en Lia Evers as Harrie en Saar van Aagter. Mar dizze kier was nie ut durpsnejs op dun tillevisie mar un live verslag van de prinseproclamasie 1999.

Ozze vorst presentierde op dun tillevisie live ut uutkomme van de neje prins. Ut leek ofdat de prins vanachter dun tillevisie uut zeuj komme. Want un schim van de neje prins en prinses was af en toe te zien achter ozze vorst op dun tillevisie. Mar uiteindeluk stonte zej gewoën ien de zaal: ozze neje Prins Dave Clephas en zien Prinses Rian Clephas, tenminste zoë stut ut ien ut neje tillefoonboek. En now vroeg ik mej eigeluk af of dat wej misschien de brulluft gemist hebbe ofdat dat un drukfout is ien ut tillefoonboek?

Nel Clephas de moeder van Dave kreeg ut trouwes nog wel efkes werrum toen zej same mit urre mins Leo naor achter wier geroepe.

Want toen ze bovvenop de buhn, achter de scherme, de prinsemantel umgehangde kreeg um as nep-prinses te fungieren, zet vorst Wout tigde ur: potdomme Nel, das lang geleje dat wej dat gedaon hebbe, iemand gewoën Prins en Prinses make zonder ut van tevurre te vraoge. Leo kos dur wel mit lache mar Nel schrok zich kapot, ut enigste wat zej zei was: dat is toch nie waor zeker?

Mar hoe dan ok, uiteindeluk stont zej toch as trotse moeder op de buhn te geniëte neve urre Dave.

Vur Dave en Rian volgde daorna unne drukke middag den natuurluk begos mit zien urste weurd as Prins en ziene toepasselukke lijfspreuk: As mök en as Veule gon wej dizze carnaval veurop en zette Oeldere 3 daag op de kop.

Vur Dave kvaam ut trouwes net op tied dat ie as Prins van Oeldere gevraagd wier. Want vanwege un gebrek an huus ien Oeldere haaj same mit zien Prinses Rian un huus gekocht ien Venraoy. Waor zej zun gaon samewoëne nao de carnaval. Zun gaon woëne, want uiteindelik ging dat moj nie dur.

Want toen ze iënmol as Prins en Prinses van Oeldere dur ut leve ginge, begosse zej zich ok echt as Prins en Prinses te gedrage.

Kiek mar naor Beatrix en Claus, Bernard en Juliana, Pieter en Margriet, allemaol hebbe zej un huus um ien te woëne en un huus um vakantie ien te viere. Dus wat dun Dave en Rian, zej kochte zich metiën un huus dur bej an dun Haalakker. Ut huus an dun Haalakker was um ien te woëne en ut huus ien Venraoy was um vakantie ien te halde. Mar ja, wie gut dur now ien Venraoy op vakantie, dor biende owwe hond nog nie an dun boëm as ge zelluf op vakantie got.

Gelukkig zage Dave en Rian dat ok gauw genoeg en ut huus ien Venraoy wier nao de carnaval dan ok rap verkocht. Of zeuj de carnaval te duur zien gewist um 2 huus an te halde. Hoe dan ok, wej dwale af, want nao de jeugdprins en de groëte prins mos natuurluk ok ut boerebrudspaar nog uitkomme.

Dit jaor wier de boerebrulluft georganiseerd dur ut zuidoosten van Oeldere. Ruud Zanders, den ut goed kunne praote ien de beste buurt van Oeldere geliert het, en pas ien de boerebrulluftsbeurt wonde, praotte ut uitkomme an mekaar. Uut un groëte goal kwame Bennie en Marjan Geve as ut neje boerebrudspaar van 1999 naor buute. Wat niemand wis kvaam dur toen uut. Bennie bleek vuzitter te zien van Um die Elluf, ut voetbalelftal van de boerebrulluftsbeurt en hej daagde de raad van 11 uut um op carnavalsdinsdag un wedstrijd te speule op ut trapveldje tigde zien elftal.

Ozze Prins en vuzitter name names de raad van 11 die uitdaging natuurluk an. En dus wier dur carnavalsdinsdag gevoetbald. Mar daorovver straks ien dit verslag mier. Enne naam vur os voetbalelftal was 'saoves bej huize Clephas onder ut eier ète snel gevonde: Schup Um Um. En dor bleef ut nie bej, want daornao belefde Schup Um Um ien dun Terp zien urste training speciaal gericht op os sterkste punt: de 3^e helft. Waorvur nog veul traininge zun volge.

De urste training nao de gezellige prinseproclamasie was un bezuuk an de prinsereceptie van ut Veule. Umdat os Prinses Rian nog ien ut Veule wonde, kosse wej natuurluk op dit fiëst nie ontbrèke. De leste kier dat wej ien ut Veule ware gewist, was op de jubileumreceptie van Ut Dartele Veule. Ozze vorst Wout haaj toen enne pak struj bej zich den op de iën of andere manier op ut end van dun aovend dur dun hiële zaal op lej. D'n toenmalige kroegbaas Rien de Laat was dor toen zo kwaod ovver dat ie zoëwat kokte van gif. Dizze kier woj Wout ut toch anders doen. En dus vroeg ie an de neje kroegbaas Antonie ofdat den ien plats van te koke van gif, nie gewoën vur ozze Prins Dave en Prinses Rian en de Veulese Prins en Prinses echt woj koke. Wej han alles bej os vur un paar goeje uutsmieters en gelukkig liet den neje kroegbaas zich nie kenne. Ien plats van te koke van gif kokte ie mit plezier vur ozze Prins. En 'saoves an ut end van dun aovend dekte ie netjes midde ien de zaal de toffel vur alle Prinse en Prinsesse die dur ware. Zoëdat dees hoëgwaardigheidsbekleijers lekker kosse ete.

De jonges van de raad kregen toen ze dit allemaol anschouwde natuurluk ok goeje honger. En daorum wier snachts bej Rian thuis de frietpan angestokt um dees urste training goed af te sluite.

Nao unne dag rust was ut toen unne dag latter tied vur de 2^e training, un bezuuk an de 3x11 jeugdcarnavalsreceptie ien Cassele en de jubileumreceptie van Vorst Bert Linskens en vurzitter Sjef Arts van de Karklingels ien Aostrum. Die leste 2 liet ozze vorst ien Aostrum onderling efkus touw trekke. En ut was toch moj um te zien hoe 2 minse zich zoë uutsloofde vur enne druuge vlaai en enne alde cake van de Hema.

Wej trainde os ien den tied echt te barste, want un paar daag latter mosse wej dur wer an op de JVV aovend.

Het is net ofdat de JVV aovend mit ut jaor bèter liekt te werre. Ut is nog nie zô lang geleje dat dizze aovend bejna op zien gat lej. Mar ok dit jaor was ut gelukkig wer hartstikke druk. Nabbe Sef zurgde wer vur de muziek, de volksdansgroep verzurgde wer un optreje en natuurluk was den durpspolitiek dur ok wer bej.

Thei Hendrix mos dur op dizze aovend an geluuve, zien jaor as JVV prins zaat d'r op. Nao enne leste speech, den mier op enne buut leek as op enne leste speech van enne prins, zette ie de muts mit vere af en genoot same mit zien vrouw Mia van enne moje aovend.

De jonges van de raod belefde op dizze aovend iën van ur rustigste trainingsaovende. Ut echte afzien gebeurde dan ok nie op de JVV aovend mar, tenminste vur un paar van os, vur de JVV aovend. Want ok dit jaor mos dur wer enne neje JVV prins gezocht werre. En ondanks dat de JVV aovend steeds beter en gezelliger liekt te werre, valt ut steeds harder tege um enne JVV prins te viende.

D'n iëne het last van zien biën, dun andere het pillekes vur het hart en wer unne andere durft nie. Mar ien d'n tussentied as zej ow dit allemaol uut probiere te legge, hedde alle foto's van de klènkiender bekeke en is de kuukskestrommel leeg. Mar ut mojste van alles is nog wel dat ze van mekaar viende dat ze ut goed kunne doen. Hoe dan ok, ut lukt gelukkig ieder jaor toch nog wel um dur enne te viende. En dus han wej ok dit jaor wer enne neje JVV prins.

Mar um de JVV'ers toch efkus te laote vuule dat ut zuuke van enne JVV prins niet altied mit velt, haaj ozze vorst vur ut uitkomme van de neje JVV prins dit jaor wat aparts bedocht. Hej ging midde ien de mökkestal staon mit de JVV prinsemuts ien de hand. En vertelde de minse dat ut al jaore moeiluk was um enne JVV prins te viende. Hej vertelde dat ut nog ieder jaor was gelukt mar dat wej ut dit jaor vur d'n urste kier zonder JVV prins mosse doen. Mar umdat ie dat zelluf ok niks vond, stelde ie vur um de prinsemuts gewoën an mekaar dur te geve onder begeleiding van de muziek van Nabbe Sef. As Sef stopte mit speule, zeuj kieke wie dan de muts ien de hand haaj en dengene zeuj dan dit jaor as neje JVV prins of prinses dur ut lève gaon. Zoë gezet, zoë gedaon. Sommige JVV'ers zatte de muts rojaal efkus op de kop, en andere wisse nie hoe snel ze dat ding kwiet mosse werre. Uteindeluk kwaam de muts wer bej ozze vorst terecht en op dat moment kwaam Loone Ger same mit zien vrouw Gon as neje JVV prins en prinses de mökkestal binne.

Mit ziene lijfspreuk: wej gon nou nie zitte klage, mar wej verzoepe nog iëne kier ozze alde ziene wage, haaj de lachers gow genoeg op de hand en ging ie veurop op dizze JVV aovend. Halverwege d'n aovend leek de JVV aovend te verandere ien d'n afscheidsaovend van Mien van Crit. Spesjaal vur Mien, die same mit urre neje vrijer Joep ien Belfeld gut wone, haaj Nabbe Sef un liedje geschreve wat ie op dizze aovend vur Mien en Joep zong. En ge kent Mien wel, die kwaam dor natuurluk nog efkus op terug. Ge zaagt ze nog net mit ur kupke bove de buutton uutstèke toen ze Oeldere bedankte vur de fijne tied den ze hier gehad haaj. En ze beloofde volgend jaor ève goed op de JVV aovend te komme, um dan same mit Joep Oeldere mien durpke te zinge. Want dat mos Joep toch mar es liere.

Nao d'n buut, want dor leek ut wel op, van Mien van Crit was ut toen natuurluk hoëg tied vur ut ienmiddels traditionele ½ uurke van ozze moppekoning Loone Thei.

En dor kunne wej kort ovver zien, dat was prachtig! Ik heb mej laote vertelle dat ze vur dit jaor al enne JVV prins gevonde hebbe, dun aovend kan dus wer durgaon, en as ie net zô gezellig wert as ut afgeloëpe jaor, dan tèkene wej dor vur.

Zaoterdags durop ginge wej op uutnuëdiging van de piëlhaas uut Venroy nor Circus Mök. De schouwburg was verbouwd, ut antal platse was uitgebreid en durrum wil de piëlhaas de carnavalsveriëningen die angeslote zien bej de vorsteraod vort jaorluks uutnuëdigen um enne aovend mit te make op Circus Mök. Ja, en dan zitte daor mit niks te drinke en un programma wor wej op ozze Bonte Aovend nie tevreje mit ware gewist. Mar ja, we ware dur wer enne aovend uut en hopeluk is ut programma dit jaor better.

Daags durop, zondag 24 jannewarie, han wej enne drukke dag. Urst mosse wej naor de prinsereceptie ien Swolge, waor Anita Voermans same mit urre, ienmiddels mins, Eduard Maas, uutgeroepe was as Prins en Prinses. Eduard stut bekend as enne kel den gruweluk kan fiëste en umdat vorst Ben van de Bök uut Swolge toch al un bitje enne aldere kel is, besloot ozze vorst um um enne echte lekstiën um te hange zoëdat ie mit carnaval ien ieder geval genoeg minerale binnen zeuj kriege um ondanks ziene leftied mit Edje ovver te kunne fiëste. En umdat de raod van 11 uut Swolge volges ozze vorst ok nog wel enne extra trainingsaovend kos gebruke um ut fiëst tempo van urre prins bej te halde, nuëdigde heej ze uut um bej os op ut Ald Wieverbal te komme. Lang kosse wej ien Swolge nie blieve, want denzelfde middag mosse wej nog nor de receptie ien Holtus waor Nico van Tilburg 22 jaor vurzitter was van de platselukke carnavalsveriëning De Keavers. En dor was ut verschikkeluk gezellig. ‘sAoves mos dur ien Venroy nog un schaop an geluuve en daorna was ut bedtied nao alwer un druk trainingsweekend van de carnavalsveriëning.

En nao zôveul trainingsaovende en weekende wier ut onderhand natuurluk tied um os voetbalelftal Schup Um Um te presentiere an de Oelderse minse. En dit gebeurde. Op ut Ald Wieverbal zaag Schup Um Um ut lèveslicht. 11 kels gestoke ien witte overalls mit afgeknipte bokspiepe, gesponserd dur de vurzitter van de tègepartij, bruede gom Bennie Geve.

En allemaol mit rugnummer 11.

Echt opvalle dun ze ien dit outfit nie op ut Ald Wieverbal, want mit mar liefst 17 groepe was ut dit jaor wer uutzonderluk druk op ut Ald Wieverbal.

Allemaol ginge ze natuurluk vur d’n Aldwieverbal wisseltrofee en allemaol mieke ze dur eigeluk wel kans op want iederiën was wer prachtig verkled.

Uuteindeluk was ut Wil Willems den same mit zien kammeraoj as de groep achterstevurre de grötste etzak en dun bèker mit nao huus moog neme.

En eigeluk was dat ok nie zo verwonderluk want as ge den groep is goed ankiekt, dan hebbe die eigeluk ok enne veul mojere achterkant as vorkant.

Bej de duo’s ware ut Thei en Anja Willems die as “piekfijn” mit ut mèste ète naor huus ginge. En volges mej het Thei dat ‘snachts nog allemaol op gegète want volges Daan haaj Anja smerges de verkus alliën motte voere.

Zoëas al gezet ien dit jaorverslag, han wej de carnavalsveriëning uut Swolge uutgenuëdigd um bej os op ut Ald Wieverbal te komme. En ze ware dur ok, alliën un bitje anders as dat wej gedocht han. Nie ien ur schon pak mar mit un man of 20 ien de pyama. Zellufs urre prins Eduard en zien prinses Anita keke net of dat zej net uut de nest kwame. Dave en Wout vonde dat dit eigeluk toch nie kos. Doke durrum dun alde klierkast ien en makte mit enne alde mantel en ‘n alde prinsemuts Eduard toch nog un bitje prins van Swolge.

Ut beste van ut verke, de koje, de zult en ut parsvleis was dur natuurluk ok wer bej. De vloer was wer glad van de worste en ‘snachts mos dur wer enne container eier an geluuve bej Ruud Classens. Kortum un Ald Wieverbal zoëas wej dat de leste jaore gewend zien, druk, moj verkled en biëstig gezellig.

Ienmiddels was ozze carnavalskrant ut Spurriemökske ok wer verrig. Dit jaor mit enne extreem moejlukke puzzel. Zaoterdags vur de prinsereceptie wier ie wer huus an huus verkocht en afgegève bej de advertierders.

De prinsehuus ware ienmiddels al wer moj versierd en ok ut huus van Bennie en Marjan Geve was moj ien ut gruuu gezet. De boerebrulluftsbuurt was druk an ut handele en an ut ovverlegge ovver de anschaf van un supportersbus en de jonges van de raod ware wer aovende bezig mit de carnavalswage bej Wout en Lilian ien de loëds. Kortum, iederiën was dur druk mit bezig: carnaval 1999.

Mar vur ut zôwiet was, belefde wej zondags, un wèk vur de carnaval, un ontiegluk drukke prinsereceptie. De prinsereceptie is al jaore utzellufde van opzet. Mar ut iëne jaor is ut gewoën wat drukker as ut andere.

Verskillende carnavalsveriëninge, Cassele, ut Veule, de jeugdraod van Venroy en d'n Bok uut Swolge ware anwezig. Natuurluk ontbrook ok os APK-club nie en ware de ridders dur mit enne bokseriem. Oftewel zoëas zej ut vertaalde mit enne boekhalder. Toevallig ok ut beroep van ozze Prins Dave.

Dur wiere wer verschillende stukskes opgevoerd en de muziek wier verzurgd dur os Kelderband, latter afgelost dur de joekskapel uut Mersele.

Tijdens ut stukske van zien collega's kreeg ozze Prins Dave un jong big. Dit verke wierd metiën genoemd nor um zellef: Prins Davy. Hierovver latter mier.

Traditiegetrouw was dur wer enne klène lientjesrègen en kreeg ozze Prins Dave zien prinseproclamatie. Dit jaor vur ut urst gemakt dur Petra Loonen. En ik mot zegge wej ware hier ien Oeldere verwent. Math Nelissen makte jaorelang prachtige proclamaties. Mar de proclamatie die Petra vur Dave gemakt haaj duut dur echt nie vur onder en wej hope dat zej dur nog jaore mit dur wil gaon.

Saoves ging de raod an de eier bej Hans Loonen en bej Clephas zaat ut huus, tenminste zoë leek ut, vol mit de rest van Oeldere. Saoves volgde nog enne rustige aovend ien dun Terp. En dan is ut al snel donderdagaovend. Tiggeworrig vur de carnavalsveriëninge ut begin van de carnaval mit un bezuuk an de carnavalsaovend van de Scouting. Vrejdagsmiddags volgt dan ut carnavalsbal van de leggere schol en as gej dor rondkiekt dan bliekt wel dat de vaders en moeders ien Oeldere nie stil hebbe gezète want ut liekt ofdat ut steeds drukker wert vrijdagsmiddags ien ozze Mökkestal.

Op vrejdagaovend was ut tied um op ziekebezuuk te gaon ien ut ziekehuus van Venroy. Daor laag Joep Cuijpers, en menneke van 6 jaor den zien biën haaj gebroke umdat ie van ut klimrek was gevalle bej de leggere schol. En ok laag dor ozze ald durpsgenoot Piet Hellegers, den wej ok niet won ovverslaon. As latste kwame wej toen bej Jos en Petra Loonen, die han ur twedde kiendje zoon Luuk op de kienderafdeling liggen. Ozze Prins en Prinses moge bej um op de kamer nao un grondige ontsmetting. Iederien was erg blie mit ut bezuuk van de Prins en Prinses.

Druk was ut ok daags daornao zaoterdagsmiddags ien ut Gemèntehuus bej de installatie van de prinse van de Gemènte Venroy.

Jan Driesse, tiggeworrig nog net enne Oelderse, voerde dur as reserve burgemèster van Venroy ut woord en vorst Bert uut Aostrum stont dur names de kerkdurpe. Ut is eigeluk toch altied jaommer dat wej saoves dan naor de kerk motte, want vur niks drinke op rèkening van de Gemènt kumt de rest van ut jaor noëit vur. Toen wej tigge 6 uur wer mit dun taxi op Oeldere anrejde mende wej dat wej niemand vergète ware. Mar toen wej ien Oeldere ankwame bleek dat wej ozze vurzitter en Herman Jacobs vergète ware.

Hoe die uiteindeluk toch ien Oeldere zien gekomme wiët ik nie, mar saoves zate zej ien ieder geval toch netjes ien de vurste banke van de kerk.

De vastelaovesmis was wer erg druk bezocht. De Kelderband zurgde vur de muziek en ut was dur stiën mar dan ok stiën kald.

As leste ien de vastelaovesmis was het wer de beurt an ozze vorst den ien ziene toespraak ovver en mit ut wasmachien van Bom ziene Jan de Oelderse minse anspoorde carnaval te viere en blieve viere ien Oeldere.

Ovver datzellufde wasmachien wier daornao 3 daag lang nog enne hoëp gepraot en ut stond de rest van de carnaval ien ozze mökkestal as ideeëbus. Nao de mis ginge wej vur dun 11^e kier bej pastoër op de koffie en as dank vur 11 jaor gastvrijheid onderscheidde ozze vorst onder de mis pastoër ien de Orde van de Spurriemök. Ien de pastorie kreeg pastoër vervolges nog un moj kesje um al zien carnavalsonderscheidinge ien op te hange. Wat vervolges mit prinseproclamatie-ophang-taferelen opgehangen wier ien ut fiëstlokaal bej pastoër en Jet.

Saoves bej pastoër begos bej sommige ut urste griepgevuul op te speule, iets wor veul minse dizze carnaval un bitje last van kreges.

Nao ut bezuuk an de pastorie volgde unne rustige aovend ien dun Terp.

Zondags snejde ut ienens mar ondanks dat, wiere os prinse afgehald mit de carnivalswage en ginge wej same mit de Kelderband op de koffie bej Dave en Rian.

De jonges en megjes van de Kelderband kreges van Dave ien ut tuinhuuske van de familie Clephas ur jaoronderscheiding en hiele vervolges un groët snejballe gevecht ien dun hof. Ien ozze mökkestal begos de carnaval dit jaor es hiël anders as andere jaore. Wout, Dave en Rian han de hiële tap dichtgebode mit plastic gevaore lient en de carnaval wier geopend dur de tap wer vrej te knippe.

Vervolges tapte Dave en Rian de urste pilskes van de carnaval 1999 vur al die minse die zich elk jaor op neejt ienzette vur dun Oelderse vastenaovend en begos dur un druk en gezellig kienderbal. Mit natuurluk dun uutslog van de kleurplate wedstrijd uut de carnivalskrant en de snoepzakke vur de klène mökskes.

Saoves was ut net as andere jaore wer 3 daag druk, gezellig en ontiegluk het ien de soos en was dur vur de leste kier ut werrum ete bej Peter en Trees.

Wat saoves ien dun Terp toch wer de nuëdige uurkes nuëdig haaj um te zakke. Smaondags was ut wer vroeg dag vur ut goed bezochte snotneuzebal.

En ok dit jaor viel ut kadoetje van de Linde vur de allerklènste mökskes wer goed ien de smaak. Ut was dan ok un prachtig gezicht toen die klène jonges en megjes allemaol tegeliek de confetti ien de lucht smete en op ur toet begosse te blaoze.

Smiddags was ut wèr ien Venroy vur dun optocht goed en nao dun optocht han de mète wer zonne honger dat zej mar wer efkes bej Thiele an zien gewist.

Nao dun optocht volgde un rustig kienderbal en saoves ginge de deure van ozze mökkestal wer ope vur ut groëte mökkebal.

Schienbaar was dur dit jaor toch veul volk ien Venroy blieve hange en miste wej wat minse die last han van de griepgolf want ut was wat minder druk as dat wej de leste jaore gewend ware. Ok ozze Prins was nie hiëlemaol fit, mar ie beet zich flink op de tand en zwette al hossend de griep deruut. Want al was ut dan nie zô druk, ut was wel van de urste tot de leste minuut iën groët fiëst. En daor doen wej ut toch mit zien alle vur. Snachts zat Jan Lemme de pan an um eier te broje. En ik wiët nie hoe laat de leste ut gemakt het mar ut zeuj goed is kunne dat dengene dinsdagsmerges toen ie nor huus liep, de groëte supportersbus van Um die 11 tege is gekomme.

Want dinsdagsmerges um un uur of 11 trok Frans Ronge mit ziene groëte Ford de supportersbus van de boerebrulluftsbuurt dur Oeldere um de minse wakker te schudde vur de groëte voetbalwedstrijd latter op dun dag.

Ut was un bitje kwakkelwer dinsdagmiddags toen iederiën zich opmakte vur de wedstrijd Um die 11 tigde Schup Um Um.

De regen haaj dur vur gezurgd dat dur en groëte plas water stond op ut trapveldje vur de goal an Keyzers ziene kant. De boerebrulluftsbuurt haaj vur de wedstrijd van alles geregeld: zoëas unne partijdige scheidsrechter, Frans Ronge, den geluk het gehad dat ie al Prins is gewist want nao zien optreje as scheidsrechter zeuj hej dat hoëgstwarschienluk noëit mer zien geworre.

Verder han ze en echte F-side, cheerleaders, un verijbare ieretribune en un stookton vur de werming up. Die trouwes dur de jonges van de raod van 11 mit dun brandblusser van de carnavalswage vakkundig wier uitgeblaoze.

Nao ut speule van de clubliedjes begos de wedstrijd en wier dun bal, unne groëte skippiebal, ien ut spel gebrocht. Ozze keeper Marc Zanders haaj zich un hangmat ien de goal gehange. Mar hej kreeg toch genne tied um die te gebruuke. Nao wat roëkbomme en unne hiële hoëp flauwekul won de boerebrulluftsbuurt dankzij scheidsrechter Frans Ronge de wedstrijd.

De wedstrijd, die trouwes nog pienluk begos vur boerebruud Marjan.

Want toen zej dun aftrap noom vur de wedstrijd gleej zej op ur gladde trouwschuuntjes leluk onderuut mar gelukkig liep ut goed af.

De hiële wedstrijd wier trouwes live verslage dur Ruud Zanders en Peter Gommans die bove op ut buske van Electro Gommans de wedstrijd volgde.

Nao de wedstrijd trok dur enne klène optocht dur de Oelderse straote richting ozze mökkestal waar bovvenogenoemde verslaggevers veranderde ien un sort pastoers.

Um vervolges ut boerebruudspaar ien enne volle zaal ien ut onecht te verbiende.

Daornao volgde un druk kienderbal en brook ut moment an dat de carnaval ien ozze mökkestal op zien end an liep. Nao ut ète van heerlukke boeremoes en nog wat polonaises sloot ozze Prins Dave de carnaval ien ozze mökkestal op de manier zoëas hej um ok geopend haaj. Hej tapte de leste pilskes en sloot daornao mit gevaore lient de tap wer af.

Ien de soos volgde daornao de laeste aovend mit ut mökverbrande vur de jeugd. Iets wat ok dit jaor wer hartstikke moj was.

En dan dun dinsdagaovend. De laeste aovend van de carnaval ien dun Terp. Dit jaor toch wel un bitje ien ut tèken van de laeste aovend van vorst Wout. Den nao 5 jaor beslote haaj zien muts mit vère over te drage an ziene opvolger.

Ut was iets drukker as andere jaore, veul minse won dit toch ger mitmake en iederiën was natuurluk benejt wie dat de neje vorst van Oeldere zeuj werre.

Wout haaj ut dur zichtbaar moeiluk mit en naodat ie Peter Willems, den stopte bej de raod van 11 bedankt haaj vur alles wat ie vur de veriëning gedaon haaj, was ut un hiël end afgeloëpe mit den kel van mej.

Mit traone ien de oëge kreeg ie van zien 5 prinse uut hande van Dave en Rian un prachtige spiegel. En vervolges was ut ozze vuzitter Jan Nelissen den um names de veriëning un golde mökske overhandigde vur de 5 jaor waorien hej volges Jan enne biëstig goeje vorst was gewist.

En toen brook ut moment an wor veul minse al lang mit bezig ware gewist: wie zeuj de neje vorst werre?

Ut was ienmiddels 12 uur gewist en iederiën ging same mit ozze Prins Dave en Prinses Rian naor buute um de mök te verbrande.

Bovvenop de mök stont un groëte doës mit daorien van iezer de naam van de neje vorst. Oeldere Mien Durpke klonk en vanuut de vlamme wier langzaam de naam zichtbaar van ozze neje vorst: Marco de Mulder.

Ut begos wer te sneje buute en naodat iederiën Wout de hand geschut en bedankt haaj vur zien 5 jaor was ut Merrit den de felicitaties ien ontvangst moog neme as neje vorst van Oeldere.

Binne ien dun Terp sneejde ut gelukkig nie en dronke wej dur same nog enne op al wer enne goed verloëpe carnaval.

Swoensdags, aswoensdag, snejde ut nie mer mar mos dur wel wer opgeruumd werre. Rond de middag was dat wer gebeur. Smiddags was ut toen vur os fiëst op dun Haalakker waor Dave en Rian of eigeluk bèter gezet Nel Clephas, wer goed vur os gezurgd han. De prinseproclamatie wier nog efkus opgehange ien ut neje huus van Dave en Rian en zoë wier ut wer tied vur ut askruuske. En natuurluk ok dun herring en de slaatjes ien dun Terp. Ja, en dan is de carnaval afgeloëpe, mar dit jaor kwaam dur nog en vervolg. Wat gebeurde d'r nameluk tijdes de vloëiemert van de fanfaar? Toen schonk ozze Prins Dave zien ienmiddels vet gewaore verke an de fanfaar um ut bej opbod te gaon verkoëpe. En zoë gebeurde, uiteindeluk kocht Piet Classes ut verke, en van ut iën kwaam ut ander. Dur wier enne barbecue gepland vur de raod en de Kelderband. En op zaoterdag 10 juli was ut zoëwiet. Bej Wout en Lilian ien de loëds ging ut gebeure. Math Drabbels, Theo Peeters, Wout Zanders, Marco de Mulder en Dave Clephas zun vur de drank zurge en Piet Classens en Jan Nelissen betalde ut verke wat moj geslacht was tot barbecue vleis. En gelache hebbe we, ut was un moj fieëst as afsluuting van un moj seizoen. Tot diep ien de nacht zien ze dur gegaon, dit is zeker vur herhaling vatbaar. Ja, en daormit komt dur now echt un end an dit jaorverslag. Bedankt vur dun andacht.